

Rau To Paulus Imbooda Ila To Yes Pilipaia

Filipai

1 ¹You Paulus. Yeru Timoti mbesooŋa to Yesu Krisi. Nimbood rau tonene ilat to yam tamtoghon patabuaŋa to Maaron asob to aneep izi ndug Pilipai ve aneep tuŋia ila to Yesu Krisi, toman yes ŋginiŋa to matadi payam, ve yam pida to auluul uraat ne paam.^a

²Poia to Tamaan Maaron yesuru Tiina toit Yesu Krisi iza tiam, ve tiŋgin gham aneep pooi toman lolomim luuma. Onoon.

Paulus ighur yes Pilipai ila suŋuŋ toni

³Sawa isob to matag iŋgal gham, you napait Maaron tiou pa poia toni.

⁴Ve moghon moghon, naghurghur gham asob ila suŋuŋ tiou. Ve sawa to nasuŋ, nasuŋ toman lolog poia kat.^b

⁵Pasa, sawa to yam aghur ila to Krisi muuŋ, ve inim aazne, itiŋa taluplup ghiit pa uraat to varu poia.^c

⁶Ve you naghur ila naghaze Maaron tau ipamundigin uraat poia ila lolomim wa. Ve ye pale ikis uraat tonenen ila ila le sawa to Yesu Krisi imuul inim, ghoru ipasobi le isob kat.^d

⁷You lolog pa yam asob, ve sawa isob matag iŋgalŋgal gham. Naghamgham ŋgar tovene payam, nene denja. Pasa, sawa to naneep ila ruum to yabyabuŋ lolo, ma naneep pumuri ve naparab ariŋa pa saveeŋ to varu poia, ve napaghazoŋan tamtoghon pani, you nawatag: Engengou nayoŋon pa uraat tiou tonene maau. Itiŋa taluplup ghiit pani. Uraat tonene, Maaron ighuri inim nimaad itaghon ye tau poia toni. ⁸Ila Maaron mata, you nasaav payam tovene: Yesu Krisi igham ghou lolog pa yam asob raraate inimale ye tau lolo payam. Tauto nakausim naghaze le naghita gham, ghoru poia.^e

a 1:1 Mbaŋ 16:12+ **b** 1:4 Ro 1:9; 1Tes 1:2 **c** 1:5 Pil 4:15+ **d** 1:6 1Kor 1:8+
e 1:8 Ro 1:10+

⁹Suŋuŋ tiou iŋarua Maaron irau sawa isob naghaze ye tau ipalot gham, lesu ŋgar to lolood pani ve lolood pa tamtoghon ivot inim tiina ila lolomim. Ve naghaze ye tau ipaghazoŋan gham. Leso awatagi kat, ve aghazooŋ pa ŋgar toni,^f

¹⁰⁻¹¹ve aghilaal sa ŋgar to poia kat pa ataghoni. Ve naghaze Yesu Krisi ipamundigin gham, lesu ghurla tiam ighur anoŋa ve ataghon ŋgar denja. Ighaze agham tovene, yam pale apaghazoŋan tamtoghon pa Maaron tapiri ve poia toni, ve tipait iza. Ve sawa to Yesu Krisi imuul inim, yam pale lemim sosor eta maau, ve ŋgar tiam isob iŋgalaŋ moghon ila Maaron mata.^g

Paulus isaav ighaze pataŋani toni inim ataam pa varu poia

¹²Yam toŋvetaz, you naghaze yam awatag kat tovene: Pataŋani to ivot payou ne, nene ipoon ataam pa varu poia maau. Nene inim ataam pa varu poia ila irau ival tiina. ¹³Aghita. Yes ndaaba tisob to tingin kinik to Rom ruum toni, yesŋa ival tiina paam tiwatag tighaze aazne, you naneep ila ruum to yabyabuŋ tonene lolo, ve tikau ghou pa sen pasa, you nataghon Krisi ve navovotia varu. ¹⁴Ve mbeb ite paam. Toŋvetaz naol to Krisi tighita ghou naneep ila ruum to yabyabuŋ lolo ve namatughez maau. Tauto ŋgar tiou tonene ipalot di, le yes paam timatughez muul maau. Tighur ila to Tiina toit ariana, ve tirei taudi pa uraat to votiaŋ saveeŋ toni.

¹⁵Onoon, tamtoghon pida to tivovotia Krisi varu to sualen, tighamgham pa taudi izadi. Yes tighita uraat tiou ilaan poia, ve ireu lolodi. Tauto tiparזור pa savsaveeŋ, ve tighaze titatan ghou. Eemoghon tamtoghon pida tivovotia Krisi varu toman ŋgar poia ve tighaze tiuul ghou. ¹⁶Pasa, lolodi payou, ve tiwatag tighaze Maaron igham ghou nanim sualen pa napariaaŋ saveeŋ to varu poia, ve napaghazoŋan tamtoghon pani, lesu tighilaala tighaze nene saveeŋ sosori maau. ¹⁷Yes pida to tivovotia Krisi varu toman ŋgar to denja maau, tighamgham pa taudi izadi moghon. Tighaze tigham tamtoghon lolodi, lesu tipul ghou ve titaghon di. Aghita. Aazne, you naneep ila ruum to yabyabuŋ lolo, ve ndiran tonowen tighaze tighur pataŋani ite paam iza tiou. ¹⁸Eemoghon tambaŋa paam. Yes tivotia varu poia toman sa ŋgar, nene mbeb todi. Ighaze onoon tigham uraat tonowen pa tipait Krisi iza, ma ŋgar ite paam ineep ila lolodi, you pale lolog poia moghon. Pasa, Krisi varu ila pa tamtoghon itaghon sa ataam, nene igham ghou lolog poia.

¹⁹Tovenen you pale lolog poia kat to aazne, ve itaghoni taghoni gha ila. Pasa, yam aghurghur ghou ila suŋuŋ tiam, ve Yesu Krisi Avuvu

f 1:9 Ep 1:17+; 1Tes 3:12 g 1:10-11 1Kor 1:8; Kol 1:10; 2Pe 3:14

iuuluul ghou. Tovenen you nawatag naghaze: Maaron pale ipas ghou navot pa pataņani tonene.^h

²⁰Eemoghon ighaze naneep, ma tirab ghou namaat, nene mbeb sorok. Ve mbeb ee moghon to lolog pani kat, ve moghon moghon nazuarua ghou pani, nene vene: Lollog pa namatughez, ma naghām űgar eta to pale ighām ghou mayag ila Maaron mata ne maau. Naghaze nayoon ariana, ve navotia Kriűi iza ighazoű. Ve naghaze űgar to naghāmghām di izi taan ne, tisob tipait ye iza. To aazne, ve itaghoni taghoni gha ila.ⁱ

²¹Pasa, you naghita naghaze nepoű tiou pughu, nene Kriűi. Ve ighaze namaat, nene pale naghām mbeb poia to ilib kat pa nepoű tiou to taan.^j

²²Eemoghon ighaze naneep izi taan, you irau naghām uraat to ighurghur anoņa popoia. Tauto ighām ghou nakankaan pa űgar sine to lolog pani.

²³⁻²⁴űgar tiou ru. Lollog naghaze le napul taan, ve nala naneep toman Kriűi. Pasa, nene mbeb poia kat to ilib pa mbeb tisob. Eemoghon you leg uraat pa nauul gham paam. Ve ighaze naneep izi taan, nene you irau naghām uraat tonene.^k

²⁵Tovenen you naghur ila naghaze you irau napul gham sone. Pale natal ve itiņa taneep ris. Leso napalot gham ve ghurla tiam ivot iyaryaan, ve lolomim poia. ²⁶Ighaze Yesu Kriűi iuul ghou, ve natal naneep toman gham muul, nene pale ighām gham lolomim poia kat, ve apait Kriűi iza pa ulaan tiina to ighām payou.

Yes Pilipai irau tilup lolodi inim ee moghon ve tiyoon ariana

²⁷Sambam, nene inim ndug tiam wa. Tovenen yam irau ataghon űgar to ndug tonowen. Leso laghoű tiam poia ve denņa pa varu poia to Kriűi. Tovenen ighaze natal naghita gham, ma natal maau ve naloű varumim moghon, you naghaze alup lolomim toman űgar tiam inim ee moghon, ve ayoon tunņa, ve aparab ariana pa saveeņ to varu poia to iit taghur ila ne.^l

²⁸Koiamimņa to tipamatughezan gham, yam amatughez padi malep. Ayoon tunņa. Leso aghām di tighilaal tighaze yes pale tilaledi. Ve yam ghoru, Maaron pale ighām mulin gham ve aneep pooi. ²⁹Pasa, Kriűi ndamo payam, tauto Maaron ighām poian gham ve ighām gham aghur ila to Kriűi ve anim le. Ve tonene moghon maau. Ye ipait gham ve ighām gham ambaad pataņani pa Kriűi iza paam.^m

³⁰Muuņ, yam aghita ghou nambaad pataņani ve naparab ariana pa Maaron saveeņ toni. Ve aazne, alonloű varug tighaze you naghāmghām tovene sone. Ve yam paam aghāmghām tovene. Tovenen itiņa tayoon tunņa, ve taparab ariana pa Kriűi iza.ⁿ

h 1:19 2Kor 1:11 **i 1:20** Ep 6:19+; 1Pe 4:16 **j 1:21** Ga 2:20 **k 1:23-24** 2Kor 5:8
l 1:27 Ep 4:1; Pil 3:20; Kol 1:10; 1Tes 2:12 **m 1:29** Mbarj 5:41+ **n 1:30** Mbarj 16:19+;
 1Tes 2:2

Iit irau tatatan tauud izaad, talup lolood inim ee moghon, ve lolood pa nditaad

2 ¹Yam aneep tunjia ila to Krisi, ve ye ipapalot gham. Ve ngar toni to lolo payam kat, tauto irabrab atemim. Maaron Avuvu ilup gham anim ee moghon. Ve Maaron ngar toni to lolo isamin ghiit ve iuluul ghiit, nene ipamundigin gham ve ataghon ngar raraate. ²Ighaze venen, yam irau alup lolomim toman ngar tiam inim ee moghon, ve lolomim pa nditamim ve agham poian di, inimale Krisi lolo payam ve igham poian gham. Ve azuarua gham, lesa asob ataghon ngar ee moghon. Ighaze agham tovene, nene pale agham ghou lolog poia le poia kat.^o
³Agham ngar pa taumim moghon malep. Ve agham ngar eta pa apait taumim izamim malep. Paitooj to tamtoghon, nene mbeb sorok. Yam irau atatan izamim, ve agham ngar tiina pa nditamim, ghoru poia.^p
⁴Tovenen matamim injal taumim moghon malep. Matamim injal nditamim paam.^q

Krisi ipatooj ghiit pa ngar to tatatan izaad

⁵Ngar to Yesu Krisi, akisi tunjia ila lolomim.^r

⁶Aghita. Ye Maaron tau. Yesuru Maaron raratedi.

Ngar ve tapiri isob to ineep to Maaron, nene ineep to Krisi paam.
 Eemoghon ye lolo pa ikis ngar ve tapiri tonowen maau.^s

⁷Iza tiina toman tapiri, nguruba, ve nepooj toni to ndug sambam, ye ipul di tizi tineep, ve iyok ighaze inim mbesooja sorok.
 Tauto izi inim taan ve inim tamtoghon.^t

⁸Tovenen tamtoghon tighita tighaze ye tamtoghon inimale iit.
 Ve ye itatan tau, ve mata lonlonjainja pa Maaron ila ila le imaat.
 Ve mateej toni, poia maau.
 Pasa, imaat izala ai pambarooj.^u

⁹Pughu tonene to Maaron ighami izala le izala kat ilib pa mbeb tisob, ve igham tau iza pani.
 Iza tonowen ilib pa mbeb tisob izadi.^v

¹⁰⁻¹¹Pasa, Maaron ighaze tamtoghon tisob tiput aghedi pa Yesu, ve tipait iza, ve tisaav ghazooja tighaze: “Yesu Krisi, ye Tiina.”

o 2:2 Ro 15:5; 1Pe 3:8 **p 2:3** Ro 12:10+; Ga 5:26; 1Pe 5:5 **q 2:4** Ro 15:2; 1Kor 10:24, 13:5
r 2:5 Mt 11:29; Yo 13:15; 1Yo 2:6 **s 2:6** Yo 1:1+; Kol 1:15; Hib 1:3 **t 2:7** Mt 20:28;
 Yo 1:14, 13:4+; 2Kor 8:9 **u 2:8** Mt 26:39; Yo 10:17+; Hib 5:8, 12:2 **v 2:9** Mbanj 2:33;
 Ep 1:20+; Hib 1:3+

Yes to tineep izi sambam, yes to tineep izi taan, ve yes mateerja to tineep ila taan lolo ne paam.

Tama Maaron itaghton ataam tovene, lesu tamtoghon tisob tipait iza pa tapiri ve poia toni.^w

Iit tapatoonj ghazoonja to Maaron pa tamtoghon

¹²Yam ndiran tiou, lolog payam kat. Muunj ve inim, sawa to itinja tanepneep, yam matamim lonlonjaija, ve ataghton Krisi ngar toni. Eemoghon aazne, you naneep toman gham maau. Tovenen you nasaav payam: Azuaria gham le ataghton katin Krisi ngar toni. Onoon, Maaron igham mulin gham ila uraat to Krisi wa. Eemoghon yam irau amatughez ve aroron pani, ve azuaria gham pa taghoniinj ngar to Krisi, le aghita anoja toni ivot.^x

¹³Pasa, Maaron ighamgham uraat tiina ila lolomim, ve ipapalot gham. Tauto lolomim aghaze le ataghton ngar to igham Maaron lolo poia, ve tapirimim irau to ataghton ngar tovene.^y

¹⁴Sa ngar to ighaze aghami, aghami toman lolomim poia. Ayasiil ve awazoran gham pani malep. ¹⁵⁻¹⁶Lesu lemim sosor eta sob, ve ngar tiam isob ingalaan ve denja moghon ila Maaron mata, ve aneep animale ye ndinatu. Ival tiina to taan to aneep ila lolodi, laghoonj todi denja maau, ve titaghton ngar samsamia. Eemoghon yam akis saveen mata yaryaara, ve azuzuuna ila todi, tauto apatoonj ghazoonja to Krisi padi animale pitum to tiran pa mboj. Ighaze yam ataghton ngar naol tonene, sawa to Krisi imuul inim, you pale lolog poia, ve napakur ghou payam. Pasa, gabuamim pale ipatoonj ghou ighaze you napul tapirig payam sorok maau. You naghama katin uraat tiou ve anoja ivot.^z

¹⁷Ghurla tiam ipamundigin gham, tauto arei taumim pa Maaron ve ambesmbees pani toman tinimim iza. Injar tiam tonanan, nene inimale watoonjrau poia eez to yam aghuri ila toni, ve igham ghou lolog poia toman gham. Onoon, aazne nambaad patajani ve nakankaan: Pale sinj tiou imalinj ve namaat ma venen. Ighaze ngar tovene ivot, nene pale inimale vaen to tilinj izala watoonjrau tiam pogho.^a

¹⁸Tovenen sa ngar to ighaze ivot payou, yam lolomim poia. Lesu itinja lolood poia.^b

Paulus ighaze imbaan Timoti ila injig yes Pilipai

¹⁹You naghur matag pa Tiina toit Yesu naghaze mala maau pale igharaat ataam eta, lesu nambaan Timoti ilat injig gham ve ipalot gham.

w **2:10-11** Yo 5:23; Mbanj 2:36; Syg 5:13 x **2:12** Mbo 2:11; 1Pe 1:17 y **2:13** Yo 15:5; 2Kor 3:5; Hib 13:21 z **2:15-16** Mt 5:14+; Ep 5:1,8; 1Tes 2:19+ a **2:17** Mbanj 21:13; 2Tim 4:6 b **2:18** Pil 3:1, 4:4

Ve sawa to ighaze ye imuul inim ve isavia varumim, nene pale igham ghou lolog poia, ve ipalot ghou paam. ²⁰You leg ngeu ite paam inimale Timoti maau. Yeru ngar tiei ee moghon. Pasa, sawa isob, ye ighamgham ngar tiina payam, ve ikalkaal ataam pa iuul gham. ²¹Tamtoghon katindi matadi ingalngal taudi moghon. Ve mbeb to Yesu Krisi ighita di ighaze tintina ila mata, nene yes tigham ngar padi maau.^c

²²Eemoghon Timoti, yam awatagi wa. Ye ngeu poia eez. You naghita ngar ve uraat toni, ye iraua. Ye itaghon ghou inimale taug natug, ve yeru nimbessbees pa uraat to varu poia.^d

²³Tovenen you pale naneep ve naghita: Pale tighur sa ataam payou. Ghororikia moghon nambaana ilat tiam. ²⁴Ve you naghur ila ariana naghaze mala maau pale Tiina toit Krisi igharaat ataam payou, lesotaug nalat naghita gham paam.

Paulus ipait Epaproditus iza. Pasa, ye irei tau pa uraat to Krisi

²⁵Tonvetaz toit Epaproditus to yam ambaana inim pa iuul ghou pa mbolaan tiou, ye inim peria wa. Ye mbesoona poia eez to Maaron, ve igham ghou lolog poia kat. Yeru niluplup ghei pa uraat, ve yeru ndaaba to Krisi to niparab ariana pa saveen toni. Eemoghon matag ingal naghaze you pale nambaana imuul ilat tiam. ²⁶Pasa, ye ikausim pa yam asob ighaze le imuul ilat ighita gham. Ye igham ngar tiina payam pasa, iwatag ighaze yam aloon varu pa moroghoon toni wa. ²⁷Ve varu to yam aloona, nene onoon. Moroghoon tiina kat ighami, ve rismoghon tone imaat. Eemoghon Maaron lolo isamini ve iuuli, tauto tini poia muul. Ve ye engeni maau. You paam, Maaron lolo isamin ghou ve iuul ghou. Pasa, inimale Epaproditus imaat, tone igham patanani ite paam iza tiou.

²⁸Tovenen you naghaze nambaana rikia moghon imuul ilat. Leso yam aghita, ve lolomim poia muul. Ve ighaze lolomim poia, nene pale igham ghou ateg izi paam. ²⁹Tovenen ighaze ye imuul ilat peria, yam aghami toman lolomim poia. Pasa yamna, tamtoghon to Krisi. Ndiran tovene, yam irau atandag padi ve apait di.^e

³⁰Aghita. Ye rismoghon tone imaat pa uraat to Krisi. Pasa, ye iwatag: Yam aneep mala payou, ve taumim irau aul ghou maau. Tauto irei tau, ve izuaria tau le inim peria tiou, lesotaug ghou to sualen. Tovenen ulaan to yam irau agham payou maau, nene ye igham payou.

c 2:21 2Tim 4:10,16 d 2:22 1Kor 4:17; 1Tim 1:2 e 2:29 1Tes 5:12+; 1Tim 5:17

**Paulus isaav ariana pa yes Pilipaia ighaze tipatum di pa yes
to tiyaryaan pa ngar to taghoniij tutuuŋ to yes Yuda**

3 ¹Yam tonvetaz, you naghaze nasavia saveeŋ tiou ris tonene, ve isob. Yam aneep tunja ila to tiina toit Krisi. Tovenen lolomim poia le poia kat.^f

Aliŋag to muuŋ you nasavia payam, tauto aazne nayoli muul. Irau tinig imun pa bodeeŋji maau. Pasa, naghaze napoon gham pa ngar pida to denjadi maau.

²Apatum gham pa yes to tiyaryaan pa ngar to zirooŋ tamtoghon toman ngar pida to yes Yuda. Ndiran tovene, yes tinimale ngavuun sagsag.^g Uraat samia to tighamghami, nene iŋgalaŋ ila Maaron mata maau. Ve ngar to tisasavia, nene kaarom. Yes tiwaghorotin tamtoghon ve tiwaghamun ulidi sorok. Tovenen apatum gham padi.^h

³Alooŋ. Ŋgar tau to zirooŋ tamtoghon, nene mbep to lolood. Tovenen iit tamtoghon to Krisi, to tataghon katin ngar tau to zirooŋ tamtoghon, ve tanim Maaron tamtoghon toni. Nene nasavia iit tamtoghon to tanumeer tauud tapiriid ve ngar toit maau, ve tambees pa Maaron itaghon pooz to Maaron Avuvu, ve tiniid iza pa Yesu Krisi ve tapait ye iza.ⁱ

Muuŋ, Paulus itaghon katin tutuuŋ tisob to yes Yuda

⁴Ndiran tonowen tinumeer ngar to tighamghami ila taudi tapiridi, ve tipait taudi pani. Eemoghon sa ngar to yes tighami, nene you naghami paam le nalib padi.^j

⁵Pasa, sawa to tinaŋ ipoop ghou ve mboŋ inim liim ve tol, ghoru tizir ghou. You tamtoghon to Israel. Rumai tiou, nene Benyamin. Tamaŋ ve tinaŋ, yesuru Hibrua kat ve aliŋadi Hibru. Ve you paam Hibru kat ve nasaav Hibru. Ve ndiran tutuuŋa, you todi eez.^k

⁶Muuŋ, you nazuaria ghou naghaze le nataghon katin tutuuŋ to yes Yuda. Tauto ipazaagh ghou ve naghur pataŋani naol pa lupuuŋ to Krisi. Tutuuŋ to yes Yuda, you nayel pa eta maau. Nataghon di le tisob.^l

Paulus inumeer tau muul maau. Inumeer Krisi moghon

⁷Muuŋ, you naghama ngar naghaze ngar naol tonowen pale tiuul ghou lesu naneep denjiag ila Maaron mata. Eemoghon aazne, you nawatag Krisi

f 3:1 2Kor 13:11+; 1Tes 5:16 **g 3:2** Yes Yuda matadi velegin ngavuun. Yes tighita tighaze ngavuun, nene mbep to iŋgalaŋ ila Maaron mata maau. Pasa, ngavuun tighanghan mbep mbuuzadi. Ve tipaleel saveeŋ pa yes to Yuda maau ne, tighaze yes ngavuun. Eemoghon Paulus isavia saveeŋ ite muul. Pasa, ye isaav tovene: Yes to tiyaryaan pa tutuuŋ to yes Yuda ve ngar to zirooŋ tamtoghon, to iŋgalaŋ ila Maaron mata maau tinimale ngavuun.
h 3:2 Ga 5:2,6 **i 3:3** Ro 2:28+; Kol 2:11 **j 3:4** 2Kor 11:18,21 **k 3:5** Mbaŋ 22:3, 23:6; Ro 11:1; 2Kor 11:22 **l 3:6** Mbaŋ 8:3, 9:1+; Ga 1:13+

ve nanim le wa. Tauto naghita naghaze ŋgar naol tonowen, nene mbef sorok to ipoon ghou pa Krisi. ⁸Ve tonene moghon maau. You naghita naghaze mbef popoiadi tisob to taan paam, nene mbef sorok. Irau to tiuul ghou maau. Ve mbef ee moghon kat, to naghita naghaze nene mbef tau, ve mbef poia kat to ilib pa mbef to naol ne. Nene ŋgar to nawatag katin Tiina tiou Yesu Krisi. Onoon, ye inim pughu pa napul mbef tiou tisob tizi tineep. Eemoghon matag ila pa mbef tonowen muul maau. You naghita di tinimale buzbu. Pasa, ŋgar tiou iyaryaar naghaze le naghama Krisi inim leg.^m

⁹Leso sawa to Mboŋ Muri, ghoru Maaron ighita ghou ighaze you tamtoŋhon to Krisi. Tovenen ŋgar popoia naol to naghama di itaŋhon tutuun, you nanumeer eta pa ighama ghou naneep denjiag ila Maaron mata ne maau. You nanumeer Krisi moghon. Ighaze naghur ila toni, ye pale ighama ghou naneep denjiag ila Maaron mata.ⁿ

¹⁰Tovenen you naghaze le nawatag katin Krisi ve mundigiin toni tapiri.^o Ve naghaze nayoona toman Krisi pa badoon patanani, ve nataghon katin Maaron aliŋa le irau mateen tiou. Leso nataghon ŋgar to Krisi ŋgar.^p

¹¹Ighaze naghama tovene, sawa to Mboŋ Muri, Maaron pale ipamundigin ghou pa mateen.^q

Paulus izuarua tau pa taghoniin Krisi ŋgar toni

¹²You nawatag: Ŋgar to Krisi, you naghama iraua sone. Tauto aazne, nazuaria taug pani. Pasa, Yesu Krisi ighama ghou nanim le, leso nataghon ŋgar tovene.^r

¹³Yam toŋvetaz to Krisi, you nawatag: Nakis suvun ŋgar tonene sone. Ve ŋgar ee moghon to you nataghoni, nene vene: Sa mbef to muun ivot, matag ila pani muul maau. You nazuaria ghou pa ghamuun mbef to inepneep ila pa naghog.^s

¹⁴Aazne, nene inimale you naneep ila landoon tiina. Tovenen tapirig pa landoon. Leso nala peria, ve naghama atia tiou. Nene nepoon toman Krisi izi ndug sambam. Iit tamtoŋhon to taneep tunia ila to Krisi, Maaron ipoi ghiit tanim le, leso ighama atia tonenen pait.^t

¹⁵Iit to tawatag katin Maaron ŋgar toni le ŋgar toit imatu, nene pale tagham ŋgar tovene. Ve ighaze yam pida ŋgar tiam raraate inimale you maau, nene poia. Maaron tau pale ipaghazonan ŋgar tiam. ¹⁶Eemoghon sa ŋgar poia to iit taghazonan pani, iit irau mataad kisini, ve tataghoni kat.

m 3:8 Lu 9:24; Yo 17:3 **n 3:9** Ro 1:17, 3:21+ **o 3:10** Sawa to Maaron ipamundigin Krisi pa mateen, ye ipatoon tapiri tiina. Ve aazne, Krisi ireirei tapiri tonowe pait pasa, ye imundig pa mateen wa. **p 3:10** Ro 8:17; 2Kor 4:10+; 1Pe 4:13 **q 3:11** Yo 11:24; Ro 6:5
r 3:12 1Tim 6:12 **s 3:13** Lu 9:62 **t 3:14** 1Kor 9:24+; 2Tim 4:7+; Hib 12:1

Tataghon yes to tipatoonj ghiit pa ngar to Krisi

¹⁷Yam tojvetaz, ngar to you napatoonja payam, matamim kisini ve ataghoni. Ve you moghon maau. Tamtoghon tisob to laghoonj todi raraate inimale yei ne, yes paam tinim patonjaan popoia payam. Tovenen aghita di, ve ataghon di pa ngar todi.^u

¹⁸Pasa, tamtoghon katindi, laghoonj todi toman ngar todi ipatoonj di ighaze yes tipul muridi pa Krisi, ve tighur koi pa ai pambaroonj toni. Saveej tonene, you nasavia payam pae katindi wa. Ve aazne, natanjan ve nasavia muul. ¹⁹Tamtoghon tovene, taghoni tala, nene pale tilaledi. Pasa, ngar to ulidi to inim maaron padi ve timbesmbees pani, ve ngar todi ilala pa mbef to taan moghon. Ve ngar to iit taghita taghaze mayanjiina, nene yes tighita tighaze ngar poia, ve tipakur di pani.^v

Sambam, nene ndug toit

²⁰Eemoghon iit ndug toit, nene sambam. Tauto taghurghur mataad pa Tiina toit Yesu Krisi, ve tasasaan sawa to ye ipul sambam, ve imuul izi inim pa igham mulin ghiit.^w

²¹Krisi, ye tapiri tiina kat. Ye irau igham mbef to sambam ve taan tisob tineep ila samba. Tovenen sawa to Mboj Muri ivot, ye pale itoor anojaad to taan to tisasami rikia, lesu tinim ye tau anoja to poia kat, ve tisul toman ngurubadi tiina.^x

Tayoon ariana ve talup lolood inim ee moghon

4 ¹Tovenen yam tojvetaz tiou, ataghon ngar to nasavia ila rau tonene. Lesu ayoon ariana, ve aneep tunja ila to Tiina toit Krisi. You lolog payam kat, ve yam agham ghou lolog poia le poia kat. Tauto nakausim naghaze le natal naghita gham, ghoru poia. You naghita gham naghaze yam anim atia poia eez to Maaron igham payou. Pasa, uraat to muuj naghama ila lolomim, nene ighur anoja.^y

²Yo, yam ndiliva ru, Ewodia ve Sintike, yamru anim Tiina toit le wa. Tovenen naghaze napalot gham, lesu alup lolomim ve ngar tiam inim ee moghon. ³Ve yom to itag ite kat ve ituru taluplup ghiit pa uraat, naghaze yom uul ndiliva ru tonanan, lesu titaghon ngar tovene. Pasa, yesuru, yeina niluplup ghei pa uraat, ve niparab ariana pa varu poia. Ve yes moghon maau. Kelemen, ve yes pida to yeina niluplup ghei pa uraat tigham tovene paam. Yes tisob izadi ineep ila rau to nepoonj mataad yaryaara.^z

u 3:17 1Kor 4:16+, 11:1; 1Pe 5:3 v 3:19 Ro 8:5+, 16:18; 2Pe 2:1+ w 3:20 Ep 2:19; 1Tes 4:16+; Hib 12:22 x 3:21 Ro 8:29+; 1Kor 15:43+ y 4:1 1Tes 2:19+ z 4:3 Lu 10:20; Syg 3:5, 20:12

Tutuun pida to iŋarua iit tamtoŋhon to Krisi

⁴Lolomim poia kat ve tinimim iza pa Tiina toit irau sawa isob. Nasaav muul. Lolomim poia le poia kat!^a

⁵Yam irau apatoon ŋgar poia ila tamtoŋhon tisob matadi. Pasa, sawa to Tiina toit, nene inim iŋharau wa.^b

⁶Lolomim imbumbu pa mbeb eta malep. Sa ŋgar ma mbeb to ighaze ivot payam, nene asavia pa Maaron. Sunuun tiam iŋarua irau sawa isob, apaiti pa poia toni, ve aghasoni pa iuul gham.^c

⁷Leso luuma to Maaron inim sigeu pa lolomim ve ŋgar tiam, ve ikis gham aneep tunja ila to Yesu Krisi toman lolomim poia. Luuma toni, nene mbeb poia kat to ilib pa iit tasob ŋgar toit.^d

⁸Yam toŋvetaz to Krisi, you naghaze nasavia saveeŋ tiou ris tonene ve isob. Ŋgar naol to paghunadi kat ve tamtoŋhon tipait di, matamim iŋgal di irau sawa isob. Ŋgar tovene: ŋgar onoon, ŋgar to poia kat ila tamtoŋhon matadi, ŋgar deŋja, ŋgar ŋgalaanja, ŋgar to tamtoŋhon lolodi pani, ve ŋgar to tamtoŋhon tipaiti. ⁹Ve ŋgar isob to you napatoot gham pani ve aghami inim tiou, toman saveeŋ isob to aloonja ila you avog, ve ŋgar isob to aghita ghou naghami, nene matamim kisin di ve ataghon di. Leso Maaron toit to ŋgar luuma pughu, ineeŋ toman gham.^e

Paulus lolo poia pa ulaan to yes Pilipaia tisangoora pani

¹⁰You nawatag: Sawa mala, yam matamim iŋgal aghaze auul ghou. Eemoghon lemim ataam maau. Ve aazne, ŋgar tiam tonanan ighur anonja, ve asangoor ulaan pida inim tiou muul. Tauto igham ghou lolog poia le poia kat, ve napait Tiina toit Yesu Krisi. ¹¹You mbolaan igham ghou ve nasavia saveeŋ tonene maau. Pasa, you naghazoon pa nepoon ŋgara wa. Tovenen sa ŋgar ma mbeb to ighaze ivot payou, poia payou ma isami payou, nene naneep toman lolog poia moghon.^f

¹²Sawa pida, mbolaan igham ghou, ve sawa pida leg mbeb katindi ve naneep poia. Mbeb naol to tivot payou, nene tiuul ghou le nawatag katin nepoon ŋgara. Tauto naghazoon pa ataam to naneep toman lolog poia irau sawa isob. Tovenen ighaze apog isuŋ ma pitool ghou, ma leg mbeb katindi, ma mbolaan igham ghou, ma sa mbeb ite paam to ighaze ivot payou, nene you naneep toman lolog poia moghon.^g

¹³Pasa, you naneep tunja ila to Krisi, ve ye ipapalot ghou. Tovenen sa mbeb to ighaze ivot payou, nene mbeb eta maau. You naraua.^h

a 4:4 Pil 3:1; 1Tes 5:16 **b** 4:5 Hib 10:37; Yems 5:8+; 1Pe 4:7 **c** 4:6 Mbo 55:22; Mt 6:25+; 1Pe 5:7 **d** 4:7 Yo 14:27; Kol 3:15 **e** 4:9 Ro 15:33; 1Kor 4:16; Pil 3:16+; 2Tes 3:16 **f** 4:11 1Tim 6:6+ **g** 4:12 1Kor 4:11; 2Kor 6:10, 11:27 **h** 4:13 2Kor 12:9+; Ep 3:16; Kol 1:11

¹⁴Eemoghon ulaan to yam agham payou ne, nene ngar poia. Pasa, nene inimale itinja talup ghiit pa badoon patajani tiou tonene. ¹⁵Yam to Pilipai awatag: You napamundigin uraat to varu poia izi ndug tiam ve muri ghoru, napul taan suruvu to Masedonia ve nala. Sawa tonenen, lupuun tiam moghon to auluul ghou pa uraat tiou, ve aghamgham leg yaam ma mbep pida. Lupuun pida tigham tovene maau.ⁱ

¹⁶Ve sawa to nala naneez izi ndug Tesalonika ve naghama uraat ila le mbolaan igham ghou, yam asasangoor ulaan pida inim tiou tonowe paam.^j

¹⁷Yam agham ngar pa alinag tonene aghaze you naghama pa leg mbep malep. You naghaze ngar poia to yam aghami ne, ivot inim tiina. Pasa, muri Maaron pale iyati ve igham lemim atia poia.

¹⁸Aazne, you nambool pa mbep eta muul maau. You leg mbep katindi ve naraua kat. Pasa, sangoor tiou to yam aghuri ila to Epaproditus, ye ighuri inim tiou wa. Ulaan tiam tonene, nene inimale watoonrau toman vuzi poia to Maaron iyok pani ve ighami lolo poia kat.^k

¹⁹Maaron tiou, ye iza tiina pa tapiri ve poia toni. Ve ye iraua kat pa mbep to naol ne. Tovenen yam to aneez tunja ila to Yesu Krisi, sa mbep to ambool pani, ye pale iuul gham pani.^l

²⁰Tovenen iit tapait Tamaan Maaron iza irau sawa isob. To aazne, ve itaghoni taghoni gha ila. Onoon!

Ndag poia to Paulus ila pa yes Pilipia

²¹Agham ndag poia tiou pa tamtoghon patabuana tisob to Yesu Krisi. Ve yes tonvetaz to Krisi to tineep toman ghou ne, ndag poia todi ilat payam paam. ²²Ve yes moghon maau. Maaron tamtoghon toni patabuana tisob to tineep sualen, ndag poia todi ilat payam paam. Ve yes to tighamgham uraat ila kinik to Rom ruum toni lolo, yes paam tisaav ariana payou tighaze you naghama ndag poia todi ilat payam paam.

²³Poia to Tiina toit Yesu Krisi ineez toman yam asob. Onoon.